

Հայոց անհետ արարիք . ասլա հրամայեաց շինել զայն .
 Հայք նոյնհետայն կանգնեցին զԻւղարերից սեղանն , կա-
 խեցին պատկերս և կանթեղս 'ի սիւնս և յայլ պատշաճա-
 ւոր սեփհական տեղիս . զարմացեալ էին ամենեքեան ընդ
 փոփոխումն Դատաւորին , զի յառաջագոյն սպառնալեօք
 գոչէր չթողուլ կախել զկուռս եւ պաշտել , զի ընդդէմ
 ասէր օրինաց . իսկ այսօր նստեալ 'ի ներքոյ պատկերաց
 հրամայէ կանգնել խորան , եւ ձայնէր՝ եթէ ունիք զայլ
 պատկերս՝ ածէք և դիք 'ի տեղիս իւրեանց : Յանձն արար
 Հայոց գրանալիս Յովսէփայ Արեմաթացւոյն , և բացեալ
 զտին զայն միայն փոքր սենեակ ինչ եւ այն եւս մթին ,
 և զայլ տեղիս առեալ 'ի կողմն իւրեանց . և 'ի լինիլ վիճ-
 մանց եւ խռովութեանց , ծերունի փոխանորդն Յունաց
 կամեցաւ տեսանել զայն տեղի , այլ միաբանք նոցին
 ասէին գնալ առանձին՝ եւ մի առնուլ ընդ իւր զոք յօ-
 տարաց , զի մի յայտնեացեն զգործն . զի 'ի չորից մա-
 սանց զմի մասն միայն թողեալ էին . յետ տեսանելոյն
 նորա զայն ընդ Տեսչի իւրեանց , հարցանէ ցՀայս .
 զի՞նչ ասէք վասն տեղւոյն այնորիկ . և նոքա ասեն , բար-
 ձէք 'ի միջոյ զանջրպետ որմն , եւ ըստ առաջին չափոյն
 յանձնեցէք մեզ . նոքա ասեն , չափն չէ յայտ , զի ոչ է
 շինեալ ըստ առաջին ձեւոյն : Առ այս պատասխանի ետուն
 Հայք , 'ի բերանոյ ձերմէ դատեացուք զձեզ . զի 'ի Կոս-
 տանդինուպօլիս աղաղակ բառնայիք , թէ ըստ առաջին
 ձեւոյն շինեցաք , այժմ յայտ յանդիման խոստովանիք զան-
 գթութիւնս ձեր . գնացեալ տեսին նաեւ գործակալքն
 և մեղադրէին զանողորմ գործս Յունաց : Դատաւորն աղա-
 չէր զՀայս սիրով կատարել զգործն , և նոքա ասեն թէ
 մեք արք եղբարք եմք և չիք խտրութիւն 'ի միջի մերում ,
 այլ ոչ է պարտ թողուլ զգթութիւն 'ի ձեռաց : Յոյնք խոս-
 տացան տալ զերկուս կամարս միայն , եւ զմին չկամէին
 տալ և աղաչէին զանց առնել զնովաւ . զի դուռ սենեկի
 նոցին առաջի նորա է , սակայն Հայք ոչ հաճեցան . եւ
 վերջացաւ այն օր վէճն և փակեցաւ դուռն :
 Եւ 'ի վաղիւն կարգեցան արք 'ի կողմանէ Դատաւորին
 և Քաղաքապետին , ընդ որս էին և այլազգի դռնապանք .
 կային նաեւ ոմանք 'ի Հայոց և 'ի Յունաց . Հայոց՝ հոգալ